

## **TH Plantations unjur harga sawit kekal kukuh**

**Oleh Wartawan BH - Mac 27, 2024 @ 5:13pm**

KUALA LUMPUR: TH Plantations Bhd (THP) menjangkakan harga minyak sawit mentah (MSM) kekal kukuh pada masa depan berikutan kekangan penawaran dan permintaan.

Pengerusinya Datuk Dr Ahmad Kushairi Din berkata kesan fenomena El Nino dijangka dirasai pada 2024 dengan pengurangan jumlah hujan yang mengakibatkan pengeluaran rendah tandan buah segar (FFB).

"Permintaan, susulan dari 2023, dijangka kekal kukuh pada 2024, berikutan permintaan tinggi terhadap makanan dan biodiesel," katanya dalam Laporan Tahunan 2023 yang dikeluarkan hari ini.

Sementara itu Ketua Pegawai Eksekutif THP Mohamed Zainurin Mohamed Zain berkata meskipun tekanan inflasi ekonomi global agak berkurangan masih terdapat cabaran yang akan memperlambangkan pertumbuhan seperti kelembapan ekonomi China, ekoran tekanan dalam sektor hartanahnya.

"Harga komoditi mungkin mengalami situasi tidak menentu sekali lagi disebabkan ketidaktentuan iklim dan kejutan geopolitik. Selain itu, kesan El Nino juga dijangka berlaku pada 2024 dan boleh menjelaskan hasil tuaian dan pengeluaran, sekali gus memberi risiko kepada bekalan," katanya.

Memandangkan permintaan dijangka meningkat 3.0 hingga 4.0 peratus pada 2024, sama seperti 2023, Mohamed Zainurin berkata kekangan penawaran-permintaan akan turut meletakkan harga MSM dalam keadaan yang sukar.

"Dalam keadaan ini dan ringgit yang lemah berbanding dolar AS, harga MSM diunjur berada antara paras RM3,500 hingga RM4,000 satu tan pada 2024, berbanding harga purata 2023 pada RM3,809.50 satu tan," katanya.

Bagi memanfaatkan prospek industri yang positif, beliau berkata THP akan terus memberi tumpuan kepada kecekapan operasi untuk meningkatkan hasil dan keuntungan seterusnya melalui pemulihan semula aset perladangan tertentu.

"Pada masa yang sama, kami juga mungkin menimbang memanfaatkan nilai ladang kami serta meneruskan inisiatif mekanisasi kami pada 2024, termasuk pilihan program pajakan bagi semua mesin pengumpulan di kawasan terdekat.

"Selepas berakhirnya fasa transformasi dan untuk mengakhiri tahun kewangan 2023, THP Group terus merancang rangka kerja seterusnya yang dikenali sebagai Pelan Perniagaan Strategik 5 tahun THP Group (2024-2028), atau AL-Falah 22/22, yang akan mengubah THP Group pada masa depan," katanya. – Bernama